

8. oktober 2013

UKA 2013/18
Hans Enoksen

Nuummi umiarsualivittaassap sanaartorneqarnissaanut ingerlanneqarnissaanillu siunertaqartumik aktiaateqarluni ingerlatsivimmik pilersitsisoqarnissaanik kingusinnerpaamillu UPA2014-imi ingerlatsiviup umiarsualiviullu pissutsinut nalimmasarneqarnissaa pillugit Naalakkersuisut 2013-imi suliakkerneqarnissaat pillugu Inatsisartut aalajangiiffigisassaattut siunnersuut.

(Naalakkersuisut Siulittaasuut aamma Nunanut allanut tunngasunut Naalakkersuisoq)

Nuummi umiarsualivittaassap sanaartorneqarnissaanut Naalakkersuisut 2013-mi suliakkerneqarnissaat pillugu aalajangiiffigisassatut siunnersuut pillugu oqaaseqaatissarput Siumumit saqqummiutissavarput.

Ukiorpanngortuni Nuummi umiarsualivik eqqartorneqartuartarsimavoq pisariaqartitsinermut naapertuukkunnaarluinnarnera tassalu mikivallaalersimanagera pillugu, minnerunngitsumillu sullissinerup illersorneqarsinnaasumik ingerlanneqarsinnaajunnaariartuinnarnera aammalu isumannaatsumik sulinerup kiisalu sillimaniarnerup appariartuinnarnera pillugu oqallinnerit annertuut ingerlanneqartarsimapput, tamannalumi paasinarluarpoq.

Tassami Nuummi umiarsualivik mikivallaalersimavoq, taamatullu sulineq sullissinerlu minnerunngitsumillu sillimaniarnermi pissutsit illersorneqarsinnaajunnaarsimapput taamatut ingerlaannartoqarnissaanut, taamaattumik umiarsualivimmi pissutsit pitsanngorsarneqarnissaat Nuummi pinngitsoorneqarsinnaajunnaartoq Siumumit oqaatigissavarput.

Nunatsinni sullinneqarnikkut sapinngisamik akikinnerpaamik ingerlasoqarnissaa tamatta inuiaqatigiit soqutigaarput soqutiguartariaqarlugulu. Nunarput angeqaaq inukitsunnguullunilu illoqarfiit nunaqarfiillu imminnut qanittunnguunngillat aqqusineqaranilu pinngitsooranilu immakkut tamatigut pajunneqartarlutik taamaattumik akikitsumik tamattalu nammasinnaasatsinnik akilersuinissaq tamatsinnut pingaaruteqarluinnarpoq sanaartornissami sumiluunniit tamanna eqqarsaatigilluarlugu aallaviulluinnartariaqarpoq.

Taamatut oqariarluta taava nalornissutaasinnaasut ukua Siumumit saqqummiukkusuppagut.

Nassiussanik ingerlatsineq nunatta iluani sukkanerulissasoq Nuummi umiarsualivik allineqarpat oqaatigineqarpoq, tamanna assortussallugu ajornakusoorunarpoq, kisiannili ullumikkut ilaatigut nunatta iluani nassiussanik angallassineq ilumut sukkanerulissanersooq akikinnerulissanersorlu ilanngullugu apeqqusertariaqarpoq.

Tassami nunatta iluanut nassiussat imarpikkut ikaarunneqartartut tamavimmik Nuummut niorarneqartalissapput, soorunami tamanna Nuummi ulapinnerulernermik inissamillu annerusumik pisariaqartitsinerulernermik kinguneqartussaavoq.

Tamatuma kingunerissavaa nutaanik aamma umiarsualiornissat sinerissamut nioqqutissanik nassiussanillu siammarterisussanik, taavami soq toqqaannartumik illoqarfinnut anginerusunut imarpikkoortatinik tikinneqarsinnaassanngillat? Aammami taamaaliornikkut nioqqutissat nassiussallu akikinnerulerneqarsinnaanerat eqqarsaatigisariaqarmat. Aammalu assersuutigalugu aalisakkanik tunisassiat nunanut allanukartut aamma Nuummi nioorarneqartalissapput. Tamanna akitsorsaanermik kinguneqassanngilaa? Tassami akikinnerusumik eqqarsaraanni ataasiarluni umiarsuarmut nuussineq akikinnerussagaluarat.

Taavami nunap sinnerani umiarsualiviit qanoq inissisimalissappat? Pajuttuineq nutaamik aqqissuunneqassava? Sanaartornissat ingerlanneqassappat? Imaluunniit umiarsualivini ineriartortitsinnissaq unitsinneqassava?

Tassami nalunngilarput sinerissami umiarsualiviit aamma pisariaqartitsisoqartoq pitsanngorsaasoqarnissaanik pingaartumik Ilulissat Uummannarlu eqqarsaatigalugit taakkununga qanoq pilersaaruteqartoqarpa?

Sisimiuni umiarsualivik allineqarnikuvoq kommunip nammineerluni aningaasaliineratigut nersualaagassaappullu utaqqiinnaratik inerisaanermi peqataammata.

Qeqqata Kommuniata isumakuluutigaa inuiaqatigiinnut pisariaqanngitsumik ilaatigut aningaasaliinerussasoq, tamannalu misissorluartariaqarpoq ilumut akikinnerulissanersoq, tassami assersuutissarpassuaqarpugut akikinnerusoqalissasoq assersuut timmisartunut mit-tarfiit sanaartorneqalermata oqaluppugut akikinnerulissasoq angallanneq kisianni aamma tamanna piviusunngunngitsoorpoq ulloq manna tikillugu nunarsuarmi akisunerpaamik aki-liilluta angalarpugut neriorsuut eqquutinneqanngitsoorpoq.

Kisianni aamma soorunami aana soqutiginarua kommuunit piginneqataanermikkut aningaasarsiorsinnaanerat ammaanneqartussanngormat aammalu aatsaat periarfissaqalissap-put piginneqataanermikkut oqaloqataanissamut.

2014-mi Naalakkersuisut nutaamik ingerlatsiviliornissamik piginnaatitaaffimmik tunineqar-nissaat qinnutigineqartoq, tassalu sanaartornermut aammalu malittarisassiornissamik qin-nuteqaat taperserlugu aalajangiiffissatut siunnersuut Sanaartornermut Ataatsimiititaliamut innersuupparput.